



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", broj 32/02), a radi provedbe carinskih i poreznih oslobađanja iz člana 26. Okvirnog sporazuma između Bosne i Hercegovine i Komisije Evropskih zajednica o pravilima suradnje koja se odnosi na finansijsku pomoć Bosni i Hercegovini u okviru pružanja pomoći putem instrumenata pretpristupne pomoći (IPA) ("Službeni glasnik BiH - Međunarodni ugovori", broj 6/08), a uz suglasnost Delegacije Evropske komisije u Bosni i Hercegovini, od 03. aprila 2009. godine, direktor Uprave za indirektno oporezivanje, d o n o s i

I N S T R U K C I J U

o postupku ostvarivanja carinskih i poreznih oslobađanja u skladu s Okvirnim sporazumom između Bosne i Hercegovine i Komisije Evropskih zajednica o pravilima suradnje koja se odnosi na finansijsku pomoć Bosni i Hercegovini u okviru pružanja pomoći putem instrumenata pretpristupne pomoći (IPA)

GLAVA I. OPĆE ODREDBE

Član 1. (Predmet)

Ovom Instrukcijom se propisuje postupak ostvarivanja prava na oslobađanje od plaćanja uvoznih dažbina i poreza na dodatnu vrijednost (u daljnjem tekstu: PDV) pri uvozu, odnosno stavljanju robe u slobodan promet u carinsko područje Bosne i Hercegovine (u daljnjem tekstu: BiH) i oslobađanje od plaćanja PDV-a pri nabavci dobara i usluga u BiH, a u skladu sa članom 26. Okvirnog sporazuma između Bosne i Hercegovine i Komisije Evropskih zajednica o pravilima suradnje koja se odnosi na finansijsku pomoć Bosni i Hercegovini (u daljnjem tekstu: Okvirni sporazum) u okviru pružanja pomoći putem instrumenata pretpristupne pomoći (IPA).

Član 2. (Ostvarenje oslobađanja)

Oslobađanja navedena u članu 1. ove Instrukcije ostvaruju se pri provedbi ugovora u okviru projekata koji se finansiraju iz IPA fonda u skladu s Okvirnim sporazumom.

GLAVA II. OSLOBAĐANJE OD PLAĆANJA UVOZNIH DAŽBINA I PDV-a PRI STAVLJANJU ROBE U SLOBODAN PROMET

Član 3.

(Oslobođanje od plaćanja uvoznih dažbina i PDV-a)

(1) Roba koja se u okviru projekata koji se finansiraju iz IPA fonda uvozi i stavlja u slobodan promet u carinsko područje BiH, oslobođena je od plaćanja uvoznih dažbina (carine, carinskog evidentiranja) i PDV-a prema članu 26. stav (2) tačka a) Okvirnog sporazuma.

(2) Lični predmeti i predmeti za domaćinstvo za ličnu upotrebu, koje uvoze fizička lica (i članovi njihovih najužih porodica), osim onih angažiranih lokalno, koja su angažirana za obavljanje poslova definiranih ugovorima o tehničkoj suradnji, oslobođeni su od plaćanja uvoznih dažbina (carine, carinskog evidentiranja) i PDV-a prema članu 26. stav (2) tačka d) Okvirnog Sporazuma, s tim da lični predmeti i predmeti za domaćinstvo budu ili ponovo izvezeni ili prodati u državi u skladu s propisima na snazi u BiH, nakon prestanka ugovora.

(3) Oslobođanja navedena u stavu (1) i (2) ovog člana ostvaruju se kod carinske ispostave na području BiH kojoj je predočena roba koja je predmet oslobođanja, kod koje ispostave korisnik oslobođanja podnosi sljedeća dokumenta:

a) za oslobođanje iz stava (1) ovog člana:

- 1) carinsku prijavu (JCI) za stavljanje odnosne robe u slobodan promet (šifra postupka "4200" u prvoj potpodjeli polja 37), koja se smatra i zahtjevom za oslobođanje, popunjenu u skladu s propisima o popunjavanju carinske prijave, te uz upisivanje u drugoj potpodjeli polja 37 carinske prijave šifre "210" (šifra za oslobođanje od plaćanja uvoznih dažbina i PDV-a u okviru IPA prema članu 26. stav (2) tačka a) Okvirnog sporazuma),
- 2) pravilno popunjenu i ovjerenu Potvrdu za oslobođanje od plaćanja uvoznih dažbina i PDV-a pri uvozu robe, izdatu u skladu sa članom 6. ove Instrukcije, na obrascu iz Priloga 1. ove Instrukcije. Kontrolni broj navedene potvrde mora biti upisan u polju 44 carinske prijave i to uz šifru dokumenta "IPA" i
- 3) specifikaciju robe iz uvoza na koju se odnosi potvrda iz alineje 2) ove tačke, a koja sadrži podatke i ovjeru navedenu u članu 6. stav (2) tačka a) ove Instrukcije. Ova specifikacija podnosi se u dva originalna primjerka, od kojih jedan primjerak carinska ispostava, nakon ovjere (uz označenje broja i datuma odnosne carinske prijave), vraća korisniku oslobođanja, a drugi zadržava uz carinsku prijavu,

b) za oslobođanje iz stava (2) ovog člana:

- 1) carinsku prijavu za stavljanje odnosne robe u slobodan promet (šifra postupka "4200" u prvoj potpodjeli polja 37), koja se smatra i zahtjevom za oslobođanje, popunjenu u skladu s propisima o popunjavanju carinske prijave, te uz upisivanje u drugoj potpodjeli polja 37 carinske prijave šifre "211" (šifra za oslobođanje od plaćanja uvoznih dažbina i PDV-a u okviru IPA prema članu 26. stav (2) tačka d) Okvirnog sporazuma), osim za robu koja može biti stavljena u slobodan promet uz oslobođanje od plaćanja uvoznih dažbina i PDV-a na osnovu usmene carinske prijave,
- 2) potvrdu izdatu od Delegacije Evropske komisije u BiH (u daljnjem tekstu: EK), a kojom se potvrđuje da je korisnik navedenog oslobođanja angažiran za obavljanje poslova definiranih ugovorom o tehničkoj suradnji u okviru IPA i
- 3) spisak robe koja se uvozi, potpisan od strane korisnika oslobođanja, u dva primjerka, od kojih jedan primjerak carinska ispostava, nakon ovjere (uz označenje broja i datuma odnosne carinske prijave), vraća korisniku oslobođanja, a drugi zadržava uz carinsku prijavu.

(4) Ako se uvoz robe po osnovu oslobađanja iz stava (1) i (2) ovog člana ne vrši odjednom, nego sukcesivno, za istu se, kod svakog pojedinačnog uvoza, carinska prijava iz stava (3) ovog člana podnosi kod iste carinske ispostave kod koje je prvobitno započet postupak uvoza i oslobađanja, koja ispostava će pratiti uvoz robe putem sukcesivnog otpisa vrste, količine i vrijednosti robe koja se uvozi po svakoj carinskoj prijavi uz označenje broja i datuma odosne carinske prijave na podnijetoj specifikaciji robe iz uvoza, odnosno spisku robe.

(5) Odluku o oslobađanju od plaćanja uvoznih dažbina i PDV-a po podnijetoj carinskoj prijavi iz stava (3) ovog člana, carinska ispostava donosi u vidu zabilješke u polju C (npr. "Oslobodeno po čl. 26. stav 1. tačka a) IPA Okvirnog sporazuma" ili "Oslobodeno po čl. 26. stav 1. tačka d) IPA Okvirnog sporazuma", ovisno koja situacija je u pitanju), ako podnijeta carinska prijava i uz nju priložena dokumenta sadrže sve potrebne podatke i zahtjev korisnika oslobađanja se u cijelosti usvaja. Navedenu zabilješku carinska ispostava treba unijeti i u inspeksijski akt odnosne carinske prijave.

(6) Roba iz stava (1) i (2) ovog člana koja je pri stavljanju u slobodan promet oslobođena od plaćanja uvoznih dažbina i PDV-a se ne smije koristiti u svrhe različite od svrhe za koje je odobreno navedeno oslobađanje, bez prethodne obavijesti nadležnog carinskog organa i plaćanja uvoznih dažbina i PDV-a od strane korisnika oslobađanja.

GLAVA III. OSLOBAĐANJE OD PDV-a PRI NABAVCI DOBARA I USLUGA U BiH

Član 4.

(Oslobađanje od plaćanja PDV-a)

(1) U skladu s odredbama člana 26. stav (1) tačka b) Okvirnog sporazuma i člana 29. stav 2. Zakona o porezu na dodatu vrijednost ("Službeni glasnik BiH", br. 9/05, 35/05 i 100/08), isporuke dobara i usluga u BiH u okviru projekata koje finansira Evropska komisija putem IPA oslobođene su od plaćanja PDV-a.

(2) Oslobađanje od plaćanja PDV-a navedeno u stavu (1) ovog člana se ostvaruje na osnovu pravilno popunjene i ovjerene Potvrde o oslobađanju od plaćanja PDV-a, izdate u skladu sa članom 6. ove Instrukcije, na obrascu iz Priloga 2. ove Instrukcije.

Član 5.

(Izdavanje fakture)

Registirani porezni obveznik - isporučilac dobara i usluga iz člana 4. ove Instrukcije izdaje fakturu bez obračuna PDV-a. Faktura obavezno mora sadržavati i klauzulu: "Oslobodeno od plaćanja PDV-a u skladu sa članom 29. stav 2. Zakona o porezu na dodatu vrijednost".

GLAVA IV. POSTUPAK OVJERE POTVRDE O OSLOBAĐANJU OD PLAĆANJA UVOZNIH DAŽBINA I PDV-a

Član 6.

(Postupak ovjere potvrde)

(1) Po potpisivanju ugovora u okviru IPA, EK uručuje ugovaraču odgovarajući primjerak Potvrde iz člana 3. stav (3) tačka a) alineja 2) ili iz člana 4. stav (2) ove Instrukcije, zajedno s detaljnim uputama o proceduri oslobađanja na koje se uručeni primjerak Potvrde odnosi.

(2) Ugovarač koji je primio sredstva iz IPA fonda, EK podnosi popunjenu odgovarajuću Potvrdu u tri istovjetna primjerka i sljedeće:

- a) uz obrazac "Potvrda za oslobađanje od uvoznih dažbina i PDV-a pri uvozu robe", jednu profakturu robe koja se uvozi, specifikaciju robe koja se uvozi u tri primjerka, koja treba da sadrži podatke o vrsti, količini i vrijednosti robe koja se uvozi, potpis i pečat uvoznika i/ili isporučioaca robe, naziv, ime i pečat krajnjeg korisnika robe, kao i prazan prostor za potpis i pečat nadležnog ministarstva (za ovjeru specifikacije robe prije uvoza robe), kao i originalnu izjavu krajnjeg korisnika robe koja se uvozi,
- b) uz obrazac "Potvrda za oslobađanje od plaćanja PDV-a", jednu original fakturu.

(3) EK na odgovarajućoj Potvrdi, na svim primjercima, upisuje kontrolni broj. Jedan kontrolni broj, tj. jedna Potvrda treba odgovarati jednoj fakturi, odnosno profakturi, bez obzira koliko ona ima stavki (vrsta robe). Poslije provjere od strane voditelja projekta EK, lice ovlašteno od strane EK potpisuje i stavlja pečat EK na sva tri primjerka Potvrde. Nakon toga, ovisno za koje oslobađanje se izdaje Potvrda, EK zadržava:

- a) za uvoz robe - jedan primjerak Potvrde i kopiju specifikacije robe iz uvoza, a preostala dva ovjerena primjerka Potvrde i sve originalne primjerke specifikacije robe vraća ugovoraču, od kojih jedan primjerak Potvrde sa pripadajućom specifikacijom robe u dva primjerka (ovjerene od strane nadležnog ministarstva) prilaže uz carinsku prijavu iz člana 3. stav (3) tačka a) ove Instrukcije, a ostalo zadržava za vlastitu evidenciju,
- b) za nabavku dobara i usluga u BiH - jedan primjerak Potvrde, a preostala dva primjerka Potvrde vraća ugovoraču od kojih jedan primjerak zadržava za vlastitu evidenciju, a drugi primjerak daje prodavcu robe ili usluga koji mu je izdao fakturu bez PDV-a u svrhe kontrole.

Član 7.

(Evidencija i izvještaj)

(1) EK će voditi službenu evidenciju o izdatim Potvrdama iz člana 6. ove Instrukcije.

(2) EK će, do 20-tog u mjesecu za prethodni mjesec, dostavljati Odsjeku za pružanje usluga poreznim obveznicima u Regionalnom centru Sarajevo mjesečne izvještaje o izdatim Potvrdama za oslobađanje od plaćanja PDV-a, koji će sadržavati sljedeće informacije:

- a) kontrolni broj,
- b) broj, datum i vrijednost ugovora potpisanog između EK i ugovarača,
- c) naziv projekta koji se finansira iz IPA fonda,
- d) naziv ugovorača, njegova adresa i PDV broj (ukoliko ga ima),
- e) naziv predstavnika stranog ugovarača i njegov PDV broj,
- f) naziv prodavca dobara i usluga, njegova adresa i PDV broj,
- g) broj i datum fakture,
- h) ukupnu vrijednost nabavljenih dobara ili usluga u KM valuti, predmet Potvrde za oslobađanje od PDV-a.

GLAVA V. PRIJELAZNE I ZAVRŠNE ODREDBE**Član 8.**

(Povrat plaćenog PDV-a)

Ugovarač koji je, prije stupanja na snagu ove Instrukcije, već platio PDV u okviru implementacije projekata koje finansira Evropska komisija putem IPA, plaćeni PDV bit će predmetom povrata u skladu sa članom 29. stav 1. tačka 4. Zakona o porezu na dodatu vrijednost.

Član 9.

(Sastavni dio instrukcije)

Sastavni dio ove Instrukcije čine Prilog 1. (Obrazac Potvrde o oslobađanju od plaćanja uvoznih dažbina i PDV-a pri uvozu robe) iz člana 3. stav (3) tačka a) alineja 2) ove Instrukcije i Prilog 2. (Obrazac Potvrde za oslobađanje od plaćanja PDV-a) iz člana 4. stav (2) ove Instrukcije.

Član 10.

(Stupanje na snagu)

Ova Instrukcija stupa na snagu osmog dana od dana objavljivanja u "Službenom glasniku BiH".

Broj: 01-02-2-1158/09
Datum, 27.04.2009. godine

DIREKTOR
KEMAL ČAUŠEVIĆ